

Lutki

ZA KUBŁARKI

3 2011



Z DŽĚCIMI SWJEĆÍĆ

Přeco zaso mamy swjedženje a zarjadowanja organizować, při kotrychž pytamy za nowymi idejemi. Před něšto časom smy Wam pućowanje k powěšcowym figuram předstajili. Džensa poskićimy Wam tróšku hinaše stafłowe hry z časowym wobjimom něhdže 35 min.

Trjebaće:

- ▶ 3 mustwa ze 6 wosobami (Su-li starši na zarjadowanju, zapřiijeće jich!)
- ▶ 18 čapkow w třoch barbach (k rozeznawanju mustwow)
- ▶ moderatora a za kóžde mustwo pomocnika, kiž dypki liči, předawa atd.

1. HRA: POMHAJ W DOMJACNOŚĆI!

Trjebaće: ▶ lajnu

- ▶ klamorčki
- ▶ 3 falki (hraja-li dorosćeni sobu, tež fale za dorosćenych)
- ▶ 3 korby ze šatami: na př. rubiško, nósnik, t-shirt (za kóžde mustwo jenaki poskitk)

Kóžde mustwo so do rynka zestupa. Stajnje we wotstawku něhdže 8 m k přenjemu čłonej mustwa steja korby ze šatami, klamorčkami a falku. Dale přeč wisa lajna we wysokosći něhdže 90 cm. Start! Přeni wobdžělnik kóždeho mustwa běži ke korbej, wobleče so falku, spójsa šaty z korba na lajnu a spřipina klamorčki. Potom běži zaso ke korbej, sleče so falku a stupi so na kónc rynka.

Přichodny je na rjedže: Wobleče so falku, zwotwěša šaty a položi je a swoju falku zaso do korba. Postupuje so takle dale, doniž njeje posledni z rynka na rjedže był. Mustwo, kiž je přenje hotowe, dóstanje 3 dypki, druhe 2 dypkaj, poslednje jenož jedyn dypk.



2

2. HRA: NAKUPUJ!

Trjebaće: ▶ 3 blida, při kóždym jedna předawarka, a wobrazy wšelakich tworow na př.

na 1. blidže: chlěb, črij, šalka, blido, klanka

na 2. blidže: całta, škórní, taler, stólc, bul

na 3. blidže: tykanc, sandala, lžica, kamor, klocki

Mustwa wostanu w rynku nastupjene. Předawarki a wukładne blida steja něhdže 10 m zdalene wot nich, tak zo ma kóždy mustwo někak jenak dołhi puć hač k nim. Na komando „Kup sej chléb!“ běži přeni kóždeho mustwa k wotpowědnej předawarce a nastupi so před njeje do rynku. Přeni w rynku dóstanje chléb a 3 dypki, druhi dwaj, třeći jedyn. Štóz je k wopačnej předawarce běžał, dypk njedóstanje. Potom so hrajer do swojeho mustwa zady nastupi a přichodny je na rjedže. Hraje so tak dołho, doniž njesu wšitcy šesćo z kóždeho mustwa nakupować byli, byrnjež předawarki hišće twory na wuběr měli.

3. HRA: ČERPAJ WODU!

- Trjebaće:
- ▶ 3 jenake sudobja (na př. bow, měřjenski nopašk, šklíčku) a
 - ▶ 3 jenake čerpawki
 - ▶ wulku šklu (abo bow) z wodu
 - ▶ 3 lineale



Mustwa steja zaso w rynku. Škla z wodu steji něhdže 10 m zdalena wot wšitkich mustwow, čerpawki leža pódla njeje. Sudobja steja něhdže meter za poslednim člonom kóždeho mustwa. Start! Přeni z kóždeho mustwa běži k wodže, načěra z čerpawku wodu, chwata wróco na swoje městno, poda čerpawku za nim stejacemu, tutón dale zaso za nim stejacemu a tak dale hač k poslednjemu. Posledni wulije wodu do sudobja a běži zaso po wodu. Wón stupi so potom na přenje městno w rynku, da čerpawku po znatym mustreje wot jednoho k druhemu do zady k poslednjemu, kiž wodu do sudobja wulije atd. Běchu-li wšitcy po wodu, so woda w sudobju z linealom wuměri. Mustwo, kiž je najwjace wody načěrało, dóstanje 3 dypki, druhe 2 dypkaj a mustwo z najmjenje wodu 1 dypk.

4. HRA: PYTAJ A NAMAKAJ!

Kóžde mustwo dóstanje korbik a cedlku z nadawkami (Su-li w mustwje jenož pěstowarske džěci, dyrbjeli so nadawki zwobraznić), na př.

- Přinjes z publikuma:
- ▶ šnórowanje za črije (Schnürsenkel)
 - ▶ spinku za włosy
 - ▶ tošku abo nachribjetnik
 - ▶ čisty nósnič
 - ▶ rysowanku
 - ▶ časnik
 - ▶ 5 centow
 - ▶ wodžěće na hłowu (rubiško, nahłownik, kłobuk, čapku)



Ručěž ma přenje mustwo wšitko nazběrane, zakónči so hra. Za kóždu nazběranu wěc dóstanje mustwo jedyn dypk.

Předłoha za zličenje dypkow:

HÓDNOĆENSKA LISĆINA STAFLOWYCH HROW

mjena čłonow mustwa z _____ čapku:

1.	2.	
3.	4.	
5.	6.	
mjeno hry	dypkowanske prawidła	docpěte dypki
Pomhaj w domjacnosći!	Najspěšniše mustwo dóstanje tři dypki, druhe dwaj, třeće jedyn dypk.	
Nakupuj!	Hódnoci so kóždy čłon mustwa! Přeni, kiž je so při prawej předawarce nastupił, dóstanje 3 dypki, druhi 2 dypkaj, třeći 1 dypk. Štóż so pola wopačneje předawarki nastupi, njedóstanje žadyn dypk.	1. čłon: 2. čłon: 3. čłon: 4. čłon: 5. čłon: 6. čłon:
Čerpaj wodu!	Z linealom wuměrić wodu w bowje. mustwo z najwjace wodu: 3 dypki atd.	cm
Pytaj a namakaj!	Kóždy prawje nazběrany předmjet je jedyn dypk hódný.	

mjeno sudnicy: _____ cyłkowna ličba dypkow

Tak Wam přejemy wjele wjesela!

Wróćozhladowanje:

Někotre kubtarki su mje prosyli, material, kiž je w přěnich lětach *Lutkow* wušoł, hišće raz wozjewić. Tuž nětko tu w jubilejnym čisle mała wubranka:



Kajka je nazyma?

Lisćo so pisani,
žołći a čerwjeni.
Kwětka ta kermušna
z barbu njeje' zlutniwa.
Nazyma je pisana.

Silwija Wjeńcyna

Wětřik nam zaduje,
mój zmij so znošuje.
Na kermuš přeproša
hudźba žno zdaloka.
Nazyma nas zwjesela.

Hriby sej z korbikom
njejemy z lěsa dom.
Krušwy a jabłuka
nam wšitkim zestodža.
Nazyma je darniwa.

Duj, duj, wětřiko!

Duj, duj, luby wětřiko,
zmija zběhń mi wysoko.
Daloko jom lećeć daj,
wšitkim zmija pokazaj!

Duj, duj, luby wětřiko,
čisń mi wulke jabłuko,
čisń mi rjane čerwjene,
jara słódne, ličkate.

Silwija Wjeńcyna



Deščikojte wjedro

Škórnje, kabat, předeščnik
žada sej tón nazymnik.

Džensa wonka dešč so dže.
Hladaj, kak tam kapoce!
Kap, kap, kap tež do wokna
deščik kłapa wot ranja.

Škórnje, kabat, předeščnik
žada sej tón nazymnik.

Nohi, rjenje we škórnych,
móža teptać we lužach.
Haj, to je ći wjeselo!
Džěći rady činja to.

Škórnje, kabat, předeščnik
žada sej tón nazymnik.

Kabat džerži ćopłotu.
Džěći w kabatach wšě su.
Wětrik duje, dešč so dže.
Džěći hraja wjesele.

Škórnje, kabat, předeščnik
žada sej tón nazymnik.

Silwija Wjeńcyna



Moja drasta

W zymje a w nalěću,
w lěću kaž tež nazymu –
w kóždym lětnym počasu
so druhu drastu wobleku.

Bluzku, krótku sukničku
rady nošu w nalěću.

W lěću mam wot mačerki
nowy woblek kupanski.

W nazymje mam cholowy
a pulower pisany.

W zymje trjebam nohajcy
kabat, čapku, rukajcy.

Wórša Šotčić



Dalekubłanje kubłarkow

Tež lětsa poskićimy w nowembrje dalekubłanske zarjadowanje za kubłarki. Na próstwu tamnišich kubłarkow budže tute w Slepom, hdžež chcemy serbske džěćace spěwy nazwučować.

Přeprašamy kubłarki a hortnerki **štwórtk, 24.11.2011**, wot 16 hodž. do sydarnje Serbskeho kulturneho centruma Slepom.

Wotběh:

- ▶ Předstajenje přenjeje serbskeje karaokoweje DVDje
- ▶ Metodiske doporučenja k nazwučowanju serbskich džěćacych spěwow

Přijimujemy Waše přizjewjenja pod tel. čisłom 03591 / 550 418.



Lutki – 10. lětnik, wuchadža 4 króć wob lěto
 cyłkowne zhotowjenje: Domowina – Zwjazk Łužiskich Serbow z. t.,
 Rěčny centrum WITAJ

hłowna zamołwita: Silwija Wjeńcyna
 fota: RCW (titul, str. 2, 3), openclicpart.org (str. 5, 6) panthermedia (str. 7)
 Rěčny centrum WITAJ, Póstowe naměsto 3, 02625 Budyšin,
 telefon: (0 35 91) 55 04 00, e-mail: witaj-bautzen@sorben.com